

Erornan di hende grandi no mester afecta mucha

*Comision di Tumberito mester sali na
vanguardia pa mucha y no laga nan sali perhudica*

ORANJESTAD (AAN): Na momento cu erornan di hende grandi cuminsa afecta muchanan cu kier realiza nan soño, ta momento pa lanta para y cuminsa bringa na nan vanguardia. Den weekend cu a pasa DIARIO a tuma nota di full un polemica cu tabata tumando lugar ariba e Rednan Social entre algun mayor y Comision di Tumberito.

Un pleito na unda cu DIARIO ta lamenta cu na final e muchanan ta esun cu a sali perdi. E caso ta cu Comision di Tumberito a stipula algun regla cu ta trata inscripcion di Tumberito cu awe a afecta varios mucha cu tabata desea pa participa den e Festival. Mayornan cu tur aña ta inverti hopi placa pa nan yiu participa den un Festival di Tumberito e aña aki a haya nan mes den un problema cu nan mester bisa nan yiu cu nan no por participa den e Festival pasobra cu nan no por a cumpli cu e reglanan stipula pa Comision di Tumberito.

Mayornan cu tabata depende ariba Compositor y Areglistanan a haya un baño frieu ora cu nan a ricibi e yamada di e persona cu tabata encarga pa traha e cantica pa na yiu, a ricibi e informacion cu el lo no keda cla cu e cantica na tempo. Cu e decision aki ta pone cu practicamente e mayornan no por a hasi nada mas pa motibo cu e deadline stipula pa e Comision di Tumberito. Algun mayor of persona nan preocupa a yama e Comision di Tumberito pa evalua e posibilidad pa un uitstelling pa asina busca un otro Compositor y Areglista pa traha e cantica pa nan yiu.

Net ora cu bo ta kere cu Comision di Tumberito lo compronde e situacion, aki Comision a laga sa cu nan no ta bay hasi ningun excepcion mas y cu e mucha lo no wordo permiti pa participa den Festival. E caso ta uno hopi tristo pasobra si e mucha por a traha su mesun cantica, el lo a traha esaki. Pero e mucha tabata depende di un persona adulto pa traha su cantica y cu no a cumpli cune. Awo pakico e muchanan ta esun cu mester wordo afecta pa erornan di hende grandi?

Pakico Comision di Tumberito no por hasi un excepcion pa permiti e mayornan busca un otro Compositor of Areglista? Pakico e Comision no ta Sali na defensa di e mucha cu kier realiza su soño pa participa den un festival asina grandi durante temporada di Carnaval?

Ora cu a puntra e Comision di Tumberito cuanto mucha tin ta participa, e contesta tabata 10. Den pasado e Festival a conoce un record di 24 mucha ta participa y e aña aki cu supuestamente mester tin un All-Star Band cu lo mester ta hopi mas profesional, ta limita y sera inscripcion na 10 mucha y ta laga algun mucha principal afo.

Awo cu ta Carnaval 60 y cu bo kier mira un Festival hopi grandi y cu mas participante. Comision di Tumberito ta opta pa limita e inscripcion di participante y ta prefera di draai un Festival cu 10 mucha.

Hopi jammer cu e decision cu a wordo tuma pasobra ta e muchanan a sali perdi y cu un soño cu nan kier a realiza door di participa ariba un escenario, a caba di wordo kibra pa decisionnan y reglanan cu hende grandi ta stipula.